

समां - 12:25 hrs.

<><><><><><><><><><><>

Parliament Proceedings

संसद दे स्यालै आहले इजलास दा अज्ज दुआ ध्याड़ा ऐ ते SIR आहले मुद्दे पर चर्चा करोआने गी लेइयै संसद दे दौनें सदनें च अज्ज बी डंड रौली पेदी ऐ। राज्यसभा दी कारवाई शुरू होंदे गै विरोधी धड़े दे नेताएं अपनी मंग गी लेइयै नारेबाजी शुरू करी दिती। अज्ज सदन दी विशेष गैलरी जार्जिया थमां आए दे इक संसदीय शिष्टमंडल बी मजूद हे- जेहदा राजसभा अध्यक्ष सी.पी. राधाकृष्णन होरें रस्मी तौरा पर सुआगत बी कीता- पर नारे ला करदे विरोधी धड़े दे मिम्बर सभापति हुंदे आसेया बार-बार ठाके जाने पर बी नैई रुके ते रौला पाना जारी रखेया-जेहदे चलदे कारवाई 2 बजे तगर स्थगित करी दिती गई। लोकसभा च बी अज्ज इससै चाल्ली दी नजारा दिखने गी लब्बा। सदन दी कारवाई शुरू होंदे गै विपक्ष दी नारेबाजी शुरू होई गई ते बार-बार गुजारश करने दे बाद जिसलै ओ आक्खे नैई लग्गे तां स्पीकर होरें गी कारवाई 12 बजे तोड़ी स्थगित करनी पेई। 12 बजे जिसलै सदन परतियै किट्ठा होआ तां विपक्ष नै परतियै नारेबाजी शुरू करी दिती ते हेठले सदन दी कारवाई बी 2 बजे तोड़ी अगड़ी पाई दिती गई ऐ।

<><><><><><>

Add Parliament Proceedings

तोंआई संसदी मामले दे मंत्री किरें रिजिजू होरें अज्ज विपक्ष गी आखेया ऐ जे “संचार साथी” ऐप्प दे ब्हाने ओ नमां मददा बनाने दी कोशिश नैई करै कीजे एह ऐप साईबर अपराधे पर रोक लाने दी मंशा कन्नै तयार कीती गेदी ऐ। रिजिजू होरें एह गल्ल कांग्रेस नेता प्रियंका गांधी हुंदे आसेया इस मुद्दे गी तूल दिते जाने पर प्रतिक्रिया दिंदे होई आक्खी।

<><><><><><>

NIA Searches

राश्ट्री जांच एजेंसी (एन.आई.ए) नै दिल्ली कार धमाके मामले दी जांच दे सिलसिले च जम्मू-कश्मीर ते उत्तर-प्रदेश च केंई थाहरें पर छापेमारी कीती। एन.आई.ए नै आखेया ऐ जे जम्मू-कश्मीर दे शोपिया-कुलगाम-पुलवामा ते अवंतीपोरा जिलें च कुल 8 थाहरें ते लखनऊ च इक थाहरें तुपाई कीती गई। एजेंसी नै आखेया ऐ जे दवें इलाकें च केंई आरोपियें ते संदिग्धें दे परिसरें च कीती गेदी तुपाई दौरान बक्ख-बक्ख डिजिटल उपकरण ते होर दूइयां आपत्तिजनक समगरी जब्त कीती गई ऐ।

CBI -Arrest

केन्द्रीय जांच ब्यूरो (सी.बी.आई) नै 35एं बरें पुराने सी.बी.आई मामले च इक फरार शफत अहमद शांगलू गी गिरफ्तार कीता ऐ। एह मामला साबका केन्द्री गृहमंत्री मुफ्ती मोहम्मद सईद हुंदी धीह रुबिया सईद दे अपहरण कन्नै जुड़े दा ऐ। आरोपियें कथित तौर पर यासीन मलिक ते होरनें कन्नै रलियै इस अपराध गी अंजाम देने दी साजिश रची ही। शफत अहमद पर 10 लक्ख रपे दा ईनाम रखेया गेदा हा। उसी कन्नूनी तौरा पर तय समें-सीमा दे अंदर-अंदर जम्मू दी टाडा अदालत च पेश कीता गया।



Dragon Fruit

कठुआ जिले दे नगरी ग्रां च ड्रैगन फ्रूट दी कामयाब खेती बागवानी दे क्षेत्र च सब्भनें लेई इक मसाल दे रुपै च उभरियै सामने आई ऐ। HADP स्कीम तैहत माली समर्थन कन्नै दंऊ बरे पैहले शुरु कीते गेदे इस प्रोजैक्ट कन्नै मकामी समुदाय गी माली तौरा पर काफी फैयदा होआ करदा ऐ ते कन्नै नौजवानें गी बागवानी ते राई-बाई सरबंधि होरनें क्षेत्रें च कम्म करने लेई प्रेरणा बी हासल होआ करदी ऐ। अधिकारियें दस्सेया जे इस चाल्ली दे कम्म कन्नै राई-बाई कन्नै जुड़े दे क्षेत्रें च बन्न-सबन्नता पैदा करने- नमियें काइडें गी बढ़ावा देने ते ग्रामीण आजीविका गी मजबूती देने च मदद थोंदी ऐ। ड्रैगन फ्रूट दी रड करने आहले युवा उद्यमी मयंक गौतम नै अपनी कामयाबी कन्नै खिते दे होरनें केंई नौजवानें दा बी इत भेठा अगड़े बधने लेई दिल बधाया।



Prog. Announcement

आकाशवाणी दा क्षेत्रीय समाचार एकांश जम्मू अंतर्ग 4 दिसम्बर गी वन्य जीवन संरक्षण सरबंधी ध्याड़े दे मौके पर 25एं मिन्टें दी इक विशेष चर्चा प्रसारित करने जा'रदा ऐ जेहदा विशे ऐ “जागरूकता ते शिक्षा राएं वन्य जीवन संरक्षण”। एह कार्यक्रम वीरवारें दिनें 12 बजे प्रसारित कीता जाहग। इस विशेष प्रसारण च साढ़े परौहने होडन Chief Wild Life Warden ते Principal Chief Conservator of Forest. Sarvesh Rai जेहड़े इस विशे पर अपने माहिराना विचार श्रोताएं कन्नै सांझे करडन। कार्यक्रम दी मेजबानी साढ़ियां एंकर श्रुति खजूरिया होर करडन। एह कार्यक्रम मीडियम वेव 303 मीटर यानि 990 किलोहर्टज ते एफ.एम 100 अशारिया 3 मैगाहर्टज पर प्रसारत कीता जाहग।

<><><><><><>

Brig Usman Cricket

भारतीय फौज दी नौशेरा ब्रिगेड नै कल राजौरी दे नौशेरा दे आर्मी स्टेडियम च ब्रिगेडियर उस्मान प्रीमियर लीग- 2025-26 दा शुभारम्भ कीता। बड़े उत्साह दे चलदे 80 ब्रिगेड दे कमांडर ब्रिगेडियर कौशल कुमार होरें इस टूर्नामेंट दा अधिकारिक तौरा पर उदघाटन कीता। मुल्खा लेई अपनी जिंदू गी कुर्बान करने आहले शहीद ब्रिगेडियर मोहम्मद उस्मान हुंदे चेते च आयोजित इस प्रतिष्ठित कार्यक्रम च जिले भरै दियां 16 टीमा हिस्सा लै रदियां न। लीग गी खेड्ड भावना गी प्रोत्साहित करने- प्रतिभा दस्सने ते समुदाय दी भागीदारी गी बढ़ावा देने दे मकसद कन्नै डिज़ाइन कीता गया ऐ। कन्नै गै शहीद ब्रिगेडियर उस्मान हुंदी हिम्मत ते विरासत दा सम्मान करदे होई पूरे खेतर च युवा एथलीटें गी प्रेरित कीता गया ऐ।

<><><><><><>

Read by : Jagmohan Sharma

Composed : Rajni Devi

Skilled : Rajat Paul

Editor : Abhilasha Sharma